


Alexandra Geerman: Un estudiante Visualmente Incapacita na Universidad di Aruba



ORANJESTAD - Cu suma placer FAVI kier a introduci su cliente Alexandra Geerman, un persona hopi tranquil y humilde, pero cu hopi determinacion pa logra su soño di completa su estudio di Berdrijfseconomie na Universidad di Aruba.

Alexandra ta un persona cu den un tempo relativamente corto a perde su bista por completo. Alexandra ta diabetico pa hopi aña caba y esaki tabata locual a causa e perdida di bista. Manera cu Alexandra mes ta constata cu e por a wordo evita si el a cuida su mes mas miho. Awe esey ta un mensahe cu sigur e kier comparti na tur es nan eyfo cu tambe ta diabetico. Alexandra, apesar di su limitacion ta optimista y determina pa caba e estudio cu el a cuminsa. Su gran motivacion pa sigui apesar di su limitacion visual ta, su mes y su famia. Alexandra kier traha mañan den comunidad y eherce un funcion cu e gusta.

Alexandra ta consciente cu pa e

por termina su estudio e tin cu custumbra cu e manera nobo di siña, haciendo uzo di medionan auxilia y computer cu programanan pa adapta. Esaki ta su reto nan di mas grandi. Ayera e tabata por a lesa y skirbi pero awendia e tin cu siña traha cu e medionan auxilia por ehempel un voice recorder pa asina por siña e lesnan di scol. Alexandra ta contento cu e tin algun amistad ainda cu ta dispuesto pa yud'e yega na su soño. Alexandra kier probecha di tuma tur e oportunidadnan di bida pa e por siña. "Mi kier inspira tur hende pa tuma cualkier oportunidad di bida pa studia" No mester laga ningun obstaculo of limitacion evita bo di logra bo meta. "Scol ta mi motivacion, pasobra mañan ami kier provee pa mi famia". Alexandra ta tumando actualmente les di type y computer na FAVI pa asina e por sigui su estudio mas independiente posibel. Tambe FAVI ta adapta e material di scol di Alexandra. □